

Parare Domino Plebem Perfectam

A lokisetse Morena Sechaba se phethehileng (Luka 1,17)

Moeletsi oa Basotho

www.moeletsoabasotho.co.ls

Mafu a seoa ke koluoa



6

Ba fasoa palong joaloka pere

8



Ba phephethela qomatsi

14



3

LITSI LI CHESA NAHA

20 YEARS
1824-2024
BASOTHO

KETEKELO EA LILEMO TSE MAKHOLO A MABELI SECHABA SA BASOTHO SE THEHILOE

MOELETSI

Ke mahlabisa lihlolong

Matsatsing a morao tjena Adv. Tlotliso Polaki o halefile haholo ka Ofisi ea hae ea Monamoli ho loanela le ho sireletsa litokelo tsa sechaba. Komisi ea Liphuputso tsa liketsahalo tsa Litsi tsa Tlhabollo ea Batšoaruo e thehiloe ho latela likhohale tsa ofisi ea hae. Bekeng ena o phatlalalitse likateng tse amanang le mahlabisa lihlolong a metebo ea sepolesa. Litlhoko tseo e leng tsona tsa mantlha tse thusang mokhoa oa tšebetso ha li eo. Matlo feela ke lirutha tse maphao tse ka 'na tsa oela neng kapa neng, 'me seo se beha bophelo ba mapolesa a sebetsang moo tsietsing.

Joalokaha eka ha oa lekana mapolesa a sebelisa seaparo se sa sireletseng seriti sa bona ho hang, ebe lithoko tse kang likoloi, mehala le matloana ke bothata. Mapolesa a iphumana a qetella a sebelisa mehala ea bona ea thekeng ho etsa lipatlisiso, ka nako e 'ngoe motho h'a hloka thuso o lokela ho reka moea hore a thusoe. Lebaka ke hobane mehala e neng e hoketsoe moo e khaohile ha e sa sebetsa. Ke taba e makatsang ruri ho utloa hore babelaelloa ba isoa makhotleng ka likoloi tsa baeti hobane sepolesa se li hloka. Sechaba se ee se thusitse empa ntho ena e kotsi hobane e ka eketsa litloko tsa molao kaha motho ea joalo a iketsetsa ka ho rata hobane a tseba hore mapolesa a mohaung oa hae. Motebong oa 'Moteng babelaelloa ba fasa kante palong motšeara, 'me ha shoalane e ka tšoara litaba tsa bona li e-s'o sebetsoe ba lula 'moho le mapolesa ka phaposing e le 'ngoe.

Se ileng sa tetebetsa maikutlo a Adv. haholo ke tlhokahalo ea bohloeki haholo moo ho seng matloana. Babelaelloa ba iphumana ba sebelisa nkho eo ba lulang le eona katlung e tšebetse mantle a bona. Mokhoa oa ho itlhatsoa ke bothata hoo ho lumelloang basali feela le hona ha ba ile linakong, ho feta moo motho o nka matsatsi a sa itlhatsoe. Monamoli o hlalosa taba ena e le khatikelo ea Litokelo tsa Mantlha tsa Botho, tseo Lesotho e tekenetseng ho li sireletsa. Le hoja babelaelloa ba nkoa e le batho ba hlorisang sechaba, ba ntse ba lokela ho hlokomeloa joaloka batho.

Monamoli o khothalelitse Lekala la tsa Lehae, Sepolesa, Borena le Puso ea Libaka ho etsa lipheto ho tseo hara tsona tse ling e leng tsa hang-hang, joaloka ho lokisa matlo, matloana le moo babelaelloa ba tla itlhatsoetsa teng. O boetse a etsa khothaleliso ea hore mapolesa a ke a tšoareloe lithupelo, e se ebe ba qetsetse koetliso mohla ba neng ba e-tsoa koetlisong lilemong tse fetileng. Hona ho tla ba thusa ho kena tšebetsong ba le mahlahlaha ba bile ba fuoe malebela le maqiti a macha a ho etsa tšebetso hobane lintho li ntse li fetoha letsatsi le letsatsi. A thoholetsa metebo e meng moo ho bonahalang ho s'o e-na le lipheto ho tse ipapisitseng le bohloeki.

Mokhethoa oa Mekaling o buile taba ea bohlokoa paramenteng mabapi le litaba tsa libukana tsa ho eta le litokomane tsa boitsebiso. O entse tšisinyo ea hore ho ke ho etsoe litokomane tsa boitsebiso tse sa felloeng ke nako e le hore batho ba tlohele ho sokola joaloka nakong ena eo esaleng li sokoleha. Linaha tse ling li se ntse li tsoelapele ho etsa litokomane tse sa felloeng ke nako, mohlala o haufi ke naha ea boahelani, Afrika Boroa. Tsena tsohle li tsoetsoe ke selo sa khale sa Basotho, ba sitoang ho fumana litšebeliso tsa mantlha hobane litokomane tsa bona e ka ba libukana tsa ho eta kapa litokomane tsa boitsebiso, li feletsoe ke nako. Letona le arabile ka ho re ha le na matla a ho etsa molao o joalo, empa seo le ka se etsang ke ho fana ka tumello ea hore Basotho ba sebelise litokomane tse ling joaloka mangolo a ho qhoba kapa a tlhaho ho fumana litšebeliso.

Taba ee ea tlhokahalo ea libukana tsa ho eta le litokomane tsa boitsebiso ebe e tla ea moriting neng? Selemo le selemo tlhoko e ntse e eketseha hobane ho na le tse felloang ke nako. 'Musu e se eka o ka boela oa hetla morao ho fumanela taba ena tharollo ea moshoelella e le hore batho ba se fetohle batšoaruo kahar'a naha ea habo bona.

Sechaba se fasuo maoto le matsoho-Lekitla

Nthabeleng Seitlheko

Sechaba se tlo fetoha batšoaruo kahar'a naha kaha se sa khone ho fumana libukana tsa ho etsa le litokomane tsa boitsebiso, 'me sena se khina tokelo ea sona ea bolokolohi ba motsamao. Tsena li boletsoe ke Mokhethoa oa Mekaling Thabiso Lekitla, tu-

ea litokomane tsa boitsebiso ea molao oa selemo sa 2011 le ho fana ka nako e ekelitsoeng sebakeng sa phano ea libukana tsa ho eta le litokomane tsa boitsibiso.

O re sena 'musu o ka se etsa ha o ntse o inahanela hore na o feta joang qholotsong ena e le ho tla ka tharollo ea moshoelella, hobane litokomane tsohle

lo sechabeng, hobane e khinne hore sechaba se fumane litšebeliso tsa bohlokoa kapa likopo tsa sekolo le likopo tsa litokomane tsa bafu.

A re ho bohlokoa hore 'musu o fane ka litokomane tse sa felloeng ke nako, kaha motho ha se na tokomane ea boitsebiso ho se litšebeliso tseo a ka li fumang kae kapa kae. Ka hona a ipiletsa ho 'musu ho pholosa sechaba kahara



long ea paramente ea la 20 Motšeanong monongoaha.

O re tlhokahalo ea litokomane tsa boitsebiso le libukana tsa ho eta e tl'o sitisa har'a tse ling, ho isoa ha bakuli ngakeng kante ho naha, bana ba eang likolong le batho ba lokelang ho phetha mabaka a bona ka bolokolohi.

Lekitla o tekile tšisinyo ea hore 'musu ka lekala le amehang litabeng o fanyehe karolo ea borobong

tse entsoeng ka selemo sa 2014 li felloa ke nako monongoaha. O phethetse ka ho hlokomelisa 'musu hore sena ke khatikelo ea litokelo tsa mantlha tsa sechaba, tsa ho tsamaea ka bolokolohi.

Mokhethoa oa Mechechane Jane Lekunya, a tlatsits tšisinyo ena ka ho supa hore tlhokahalo ea libukana tsa ho eta le litokomane tsa boitsebiso e bakile bothata bo boho-

tlokotsi ena.

Letona la tsa Lehae, Borena le Sepolesa, Mohlomphehi Lebona Lephema, o itse letona ha le na matla a ho fanyeha karoloana ea molao empa le na le matla a ho fana ka tumello ea hore sechaba se sebelise a mang a mangolo a boitsebiso joaloka mangolo a tlhaho, libukana tsa ho eta le mangolo a ho qhoba e le hore se fumane litšebeliso.

Litsi li itlhoekise-Rakuoane

Nthabeleng Seithleko

Letona la Mehlang la Toka le Molao Adv. Lekhethe Rakuoane, o re 'Muso oa Lesotho o lokela ho phatlalatsa letšolo la boithoekiso kahar'a Litsi tsa Tšireletso hore ba tsebe ho hlola litlolo tsa molao. O boletse tsena puisanong le Koranta ka la 21 Motšeanong monongoaha.

O itse e bile letona 'me o tseba bothata bo teng litsing hobane ba bang ba bahlanka libakeng tseo ke metsoalle ea masholu e ba nonosang lichelete, ha ba bang ba tloaelane le litlokotsebe tse tsebelang 'muso. O re bahlanka ke bona ba kenyetsang naha metsi ka moeli ka ho se tšepahalle kano ea bona ea ho sireletsa naha. A re ho bohlokoa hore ho phatlalatsoe qomatsi khahlanong le sena e se le Basotho ba aparang likobo kapa libini tsa 'mino oa Sesotho.

O bontšitse 'muso o entse hantle ka ho phatlalatsa Gazette e hlakolang lihlopha tse fapakaneng tsa batho ba ipitang ba likobo, leha ho le joalo o iphelele fatše hobane lihlopha tse joalo e sa le li sa ngolisoa

ka molao kahar'a naha. O ipilelitse ho 'muso ho qoba litšoso sechabeng empa o tle ka tharollo bothateng ba lipolao tsa batho ka lithunya 'moho le bosholu ba liphoofole.

O supile 'muso o tlameha ho tla ka mekhoa ea ho nts'a lithunya ka metso le ho hlola bosholu ba liphoofole e se o phatlalatsa Gazette e fang bahlanka matla a ho hlokatlatsa batho le ba se nang molato. A hopotse 'muso melao ea Litokelo tsa Mantlha tsa Botho e tlamang linaha tshole eo ho shebahalang eka o iphapanyetsa eona.

A re 'muso ka ketso ena ea ho hanea batho ho apara likobo tsa mebala e itseng, o boela o nonyetsa boqapi le tlhahiso ea mesebetsi hobane likobo tseo li etsoa ke Basotho. H'a phethela o itse ba ntse ba emetse 'muso ka Letona la tsa Lehae, Sepolesa, Borena le Puso ea Libaka ho hlalosa Gazzette eo kapel'a Komiti ea Paramente.

Ka lehlakoreng le leng, Mookameli oa Lesotho Music Rights Association, Tšepang Makakole o bontšitse hore mokhatlong oa habo ha ba e-s'o kopane ho bua ka litaba tsena kaha li le ncha ba bile ba e-s'o bone hore na li amme



kholo ea 'mino joang.

A re o bona 'muso o hloketse libini tsebe hobane ha o'a ba le tlhalohanyo ea libini le makhomasha, kaha libining ho se na lipolaeano. O re ho bonahala 'muso o sa fua boletsi bo nepahetseng ho bile ho entsoe qeto ba siiloe ka thoko ba ne ba tla fana ka boletsi katamelong ea litaba tsena.

Litaba tsena li latela hore 'Muso ka Letona la Litaba tsa

Lehae le Sepolesa, Borena la Puso ea Libaka Mohlomphehi Lebona Lephema a nts'e phatlalatsa ea molao e felisang mekhatlo ea Banna ba Likobo kaha mekhatlo e joalo 'muso o re e fehla lipolao le lintoa tse sa feleng kahar'a naha le Afrika Boroa.

Mekhatlo e thibetsoeng ka molao ke e latelang ho ea ka phatlalatsa ea 'muso; Terene ea Mokata-Lirope, Terene ea

Mosotho Chakela, Letlama (Seakhi), Letlama le lekhubelu, Liala-Mabatha, Khang-Kholo, Sephiri, Phula-Bobete, Parachuti, Tonado, Mahana-Puso, Terata e'a hlaba le mekhatlo e meng e sebitsang joaloka e ka holimo.

Tokomane e phatlalatsang thibelo ena e hlaha ho Internal Security (Declaration of Unlawful Organisations) Notice 779 ea selemo sa 2024.

Lekala le matlafatsa bahlahisi

Nthabeleng Seithleko

Lekala la Khoebo le Mesebetsi e Mehlo le bile le 'moka le mafapha a tataisang litaba tsa khoebo le boithuto bo ntlafetseng litabeng tsa linoko, lifeme le litlama, ka la 20 Motšeanong monongoaha.

Mohokahanyi oa lenaneho la ho kenya tšebetsong tumelano ea kholiso ea moruo oa Lesotho Ramolise Rantsane, o itse morero o moholo ke ho matlafatsa moruo oa naha le khoebisano ea moshoelella le linaha tse ling. O re mahlo a bona a shebile ho matlafatsa tlhahiso ea lifeme le mafapha a tlhahiso ea linoko.

A re Basotho ba na le boiphilelo boqaping ba bona empa ba tlameha ho thakeloa ka malebela a ba thusang ho ntlafatsa khoebo kahar'a naha. O re ba tšoare ka thata ho bona hore mafapha a fapakaneng a tlhahiso a fua malebela molomong oa khoebo e holing le ho matlafala.

Lebitsong la Moemeli oa EU, Mario Varrenti, o thoholelitse



lekala ka tšebetso ea ho ntlafatsa Basotho khoepong hore ba tsebe ho hlahisa ka tsela e nang le chebahalo machabeng. A re mesebetsi oa bona ke ho hlahloba khatelopele ea morero ona le ho ntlafatsa moo e bang likhaello li bile teng. A bontša hore ba hloka ho bona Basotho ba hoeba ka tsela e lokolohileng machabeng, lihlahisoa tsa bona li sa lahle boleng hape ebile e le karolo ea tlhahiso ea mesebetsi.

Mongoli-Kakaretso oa Lekala la Khoebo le Mesebetsi e Mehlo Thabo Moleko, o bontšitse hore takatso e kholo ke ho anetsa bohlahisi ba Lesotho, ka hona ba ikemiselitse ho tšoarela bahlahisi mekhahlelong e fapakaneng lithapelo e le ho ba matlafatsa. O itse takatso ea bona e kholo ke ho bona Basotho ba ithorisa ka lihlahisoa tsa boleng, tse tšepeloang ho fepela mebaraka e meholo machabeng.

Morero oa Lesotho Economic Growth Job Creation and EPA Implementation Support Programme, o khakotsoe ka khoeli Mphalane ngoahola 'me o tla fihla pheletsong ka khoeli ea Mphalane 2026.

O rera ho theha sekolo

Tšeliso Thakholi


Ho na le bacha ba ikemiselit-seng ho tsoelapele ho iphelisa ka ho qala likhoebo tse nyenyane, etsoe Mosotho o na ope khomo lenaka h'a re: "Moketa ho tsooa o itekang, 'me mphe-mphe ea lapisa motho o khonoa ke sa ntlo ea hae." Ha ho le joalo re ile ra buisana le ba bang ba bacha ba iphelisang ka litalenta tsa bona tse fapakaneng. Tse ling tsa litalenta tsa bona li tla hlaha koranteng e tlang.

Empa kajeno re lakalitse ho qala ka ausi Rethabile Khauta(26), ea phelang Motimposo Seterekeng sa Maseru eo e leng mothehi oa khoebo e nyenyane e khabisang manala le ho rekisa litlotso ka mefuta ea tsona e bitsoang Golden Nails & Cosmetics e thehiloeng ka selemo sa 2018.

O li beha tjena:

Ha ke qeta ho phethela lithuto ka Sekolong se Sehola sa Sechaba (NUL) kamora COVID-19, hantle morero oa ka e ne e le ho etsa Lithuto tsa Bohlabolli, empa ka hlokomela hore nka iphelisa ka khoebo ea ho khabisa manala le ho rekisa mefuta eohle ea litlolo tsa mahlong le tsa moriri. Ke ne ke se ke hlokometse hore baithuti ba bangata ka hona ka moo ka NUL, ba rata ho kenya manala a khabisitsoeng ka qala ka hona ka moo ke sa le moithuti. Ba tla ka bongata bo boholo, 'me ka sebelisa mefuta e fapakaneng ea ho khabisa le ho ba kenya manala. Ha ke bona hore khoebo e tsamaea hantle ka qala ka ho hloma mok'huk'hu kantle ho sekolo, moo ke ileng ka sebetsa le bacha ba babeli bao re ntseng re tšoare ka thata 'moho le bona le kajeno.

Re sebelitse joalo ho fihlela seoa sa COVID-19 se thefula khoebo ea rona hoo re ileng ra tlameha ho fallela Maseru kaha joale maemo a khoebo a ne a se a matle. Moo re ntseng re leka ho bona hore na khoebo e hola joang, ho ile ha boela ha koaloa likhoebo tsa manala le moriri le tse rekisang litlolo ka mefuta ea tsona. Ra qala ho batla mekhoe e meng eo re ka iphumanang re ntse re sebetsa, ka hona




ra etela batho malapeng e leng eona ntho e ileng ea nyolla khoebo ea rona, le teng re ne re ntse re etse hloko melao le melaoana le lefu COVID-19 ka nako eno. Re ile ra tsoelapele tlasa maemo ano a hlobaetsang empa Morena Molimo o ile a re thusa ra pholoha. Ra lata mok'huk'hu oa rona Roma ra tla sebeletsa ho

ona koano Maseru, 'me ho fihlela kajeno re se hirile bacha ba babeli bao re sebetsang le bona. Bacha bana ba babeli ba na le litsebo tse khethehileng tsa ho tsamaisa khoebo le mekhabiso kaha ba hlile ba li etse sekolong ka kotloloho. Re boetse re rekisa le litlolo tse fapakaneng tsa mahlong le 'mele le tsa meriri.

Ha ke qala ho hlalosa batsoali ba ka ka morero ona, ba ne ba batla ba sa utloisise hore na ke habile hokae, ba bile ba hopola hore ke se ke tlohella ho etsa Lithuto tsa Bohlabolli empa ba ile ba 'na ba ntšehetsa ka lichelete ho bona hore khoebo e'a hola, ha ke ntse ke ntšetsa tsa ka pele

ho fihlela ke qetile. Kajeno re sebetsa re le bane 'me kannete khoebo e ntse e sebetsa hantle hoo re seng re bile re e-na le morero oa ho tla bula sekolo sa mofu-



ta oa sona, e le sa ho penta manala ka lipente tse fapakaneng.

Re bone ha re ntse re bala marang-rang hona ko-

ranteng ena, hore Banka ea Lesotho (CBL) le BEDCO li kentse letsoho ho holisa likhoebo tsa bacha. Re ipiletsa ho 'muso ho etsa tlatsetso ka ho batalatsa mabala molemong oa ho holisa likhoebo tsa bacha. Re kopa CBL le BEDCO li se ke tsa thusa feela bacha ba seng ba e-na le likhoebo empa li tataise le ba nang le lerato la ho iqalla likhoebo. Bacha le tsebe hore liqholotso li ngata kahar'a khoebo, empa li hloka mocha ea nang le mamele le lerato la khoebo. Ka litalenta tsa rona re ka tseba ho iphelisa, empa re hloka 'muso le libanka tse kang Standard Lesotho le BEDCO ho re tšehetsa re tsebe ho itšematlela.



BASOTHO FOOD TASTING FESTIVAL

DATE: 2 - 4 August 2024

Venue: Boqate Leisure Park

MORE DETAILS LOADING...



SPONSORS:



Bacha ba matha matlong a mothamahane-seqholo



Tšeliso Thakholi

Matsatsing ana qholotso e kholo e tšositseng lefatše ke tšebeliso e phahameng haholo ea lithetefatsi kahare ho bacha, e bonahalang e fetola sebopelo, liqeto le tsela eo

bacha ba sebetsang litaba ka eona. Ana ke mantsoe a Inspector Pakiso Seqholo oa Lefapha la Thibelo le Toantšo ea Litlolo tsa Molao le Boipoleso ba Sechaba, pitsong e neng e tšoaretsoe bacha motseng oa Ha Mohasoa tikolohong ea Qeme ka la 18 Motšeanong 2024.

Insp. Seqholo o tiisa hore lithetefatsi ka bo-tsona ha

li fihla kelellong le maling li ea taea, 'me ho hlakile hore motho ea lulang a li sebelisa ka linako tsohle ntho e 'ngoe le e 'ngoe eo a etsang e tauoe. "Ho taho hoo ho mema litlolo tsa molao. Bacha ba rona ba matha matlong a mothamahane nako eohle, 'me morao tjena ho se ho e-na le lithetefatsi tsona tse kotsi haholo le

tse ling tseo bacha ba ikakhetseng ka setotsoana kahar'a tsona." A rialo.

O re morao tjena ho na palo e phahameng haholo ea bacha kahar'a toropo ea Maseru le litoropo tse ling e tsamaeang moleng o mosoeu ka litseleng tsa Naha ea Lesotho. "Ha u batlisisa u tla fumana hore taba ea lithetefatsi ke eona e ba behileng kahara mola ona o mosoeu kahare ho tsela. Motho o tsamaea a bina sefela se sa feleng ka lebaka la tšebeliso e phahameng ea lithetefatsi, e ileng ea tetebetsa bophelo ba bona nakong eo ba tsoileng sekolong ho boetse ho se mesebetsi." O boletse joalo.

A hlokomelisa bacha hore lithetefatsi ha ho na moo li tla ba phelisa le ho ba tlisetisa bokamoso, empa lia bolae. A re bona e le sepolela b'a tseba hore lithetefatsi tsona bacha ha ba iketsetse tsona, empa ho na le kae kae moo li hlahang ho batho ba baholo kahar'a naha, bao motho a ke keng a lumela hore ba ruile ka lebaka la thekiso ea tsona, "tsena tse tsamaisoang ke lona le

le bacha."

A ipiletsa ho bacha ho ela hloko le ho behella lithetefatsi ka thoko. A re se ba makalitseng matsatsing ana, ho bonahala basali le banana ba ikakhetse haholo kahara litaba tsa lithetefatsi. A re banna ba bangata ba kene chankaneng ka lebaka la basali le banana ba ba hulelang kotsing ea tlolo tsa molao le tšebeliso ea lithetefatsi. Ereka ha Sepolesa sa Lesotho se tsotella bacha, o itse ba na le lenane le bitsoang Youth Programme moo sepolela se kenyang letsoho ntlafatso ea bophelo ba bacha.

A qetella ka ho tiisetisa bacha hore sepolela se teng ho sebetsa 'moho le bona nako eohle. "Ha re lira tsa lona rea le tšehetsa empa teng ha tlolo ea molao e le teng re tla ema ka thata ho e thibela." Ke Seqholo eo.

Bacha ba lebohile tšehetso eo ba e fuoeng ke sepolela sa habo bona se polesang metse e ka thoko ho toropo. Ba tšepisa ho sebetsa 'moho le sepolela ho fenyha botlokotsebe le tšebeliso e phahameng ea lithetefatsi. Pitso e tšoanang le ena e tlii'o tšoareloa sechaba hona Ha Mohasoa mafelong ana a beke.

Vodacom e atolosa khokelo

Nthabeleng Seitlheko

Kamphani ea Mehala le Tšebeliso ea marang-rang Vodacom Lesotho ka kopanelo le Lekala la Likhokahanyo e thakhotse tora, Thaba-Phatšoa, Ha Tšepe, ka la 17 Motšeanong monongoaha.

Mookameli oa Vodacom Lesotho Tšepo Ntaopane o itse sechaba se baballe thepa kaha ho senyeha ha eona ho bakela kamphani litšenyehelo tsa tokiso ebe ba sitoa ho atolosa libakeng tse ling. O re o ngongorehisoa ke tšireletseho le polokeho ea litora tsona hobane sechaba se sa utloisisi bohlokoa ba thepa ena. A re boteng ba tora bo tli'o thusa hore baji ba sebelise marang-rang ao ba a ratang, 'me ba se ba tla nolofalloa ke ho fumana litšebeletso le ho fetisetsana lichelete ka marang-rang.

Mookameli oa Sekolo se Phahameng sa Tšepe Bataung Sempe, o itse hona ke tlonolofatso ka hona ba

lebohile le hoja ba ile ba tšepisoa ho fuoa liphaposi tsa ho rutela lithuto tsa marang-rang, 'me ka lithophiso khaho e joalo e ne e lokela hore ebe e phethetsoe. A qetella ka hore ho kenngoe motlakase sekolong hore ba tsebe ho hokela likomporo

habonolo hobane oa letsatsi o na le ho lieha ho sebetsa. Mokanselara oa Ha Tšepe, Moutlanyana Moutlanyana, o itse o leboha ka tora ena e tli'o ba thusa ka khokelo e bobebe ea marang-rang, ho theha likhoebo le ho potlakisa tšebetso

ea bona. A re puisano e ne e se bobebe empa ha joale lintho li tlo nolofala, leha ho le joalo ba hloka litsela le motlakase.

Letona la Likhokahanyo, Mohlomphehi Nthati Moorosi o itse Letsatsi la Lefatše la Marang-rang le ne le khethoe ka selemo sa 2006, 'me mohoo oa selemo sena o re; "Boqapi

ka Marang-rang molemong oa Ntlafatso ea Sechaba le Moruo." A re boqapi ke ntho e ntle, ea bohlokoa ka hona ba bo ananela hore bohle ba tsebe ho beha bohobe tafoleng.

O re boteng ba tora ke katametso ea marang-rang le likhokahanyo metseng haholo likolong e thusa ho atametsa mekhoha ea boithuto sechabeng le ho baithuti. O itse ba hloma tora e hokelang marang-rang ohle hobane morero oa puso ke hore marang-rang a anele naha kaofela. Tora ena e tli'o fepela Thaba-Phatšoa le Mphosong, 'me ke metse e 10 e tla una molemo.

Mookameli oa Letlole la Universal Service Kanono Ramoshamole, o itse letlole lena ke la 'muso le reitsoeng ho isa litšebeletso sechabeng le litora, 'me le na le lilemo tse 15 le sebetsa ho isa litora hole le litoropo. A re motse oa Ha Tšepe le e meng e 48 e ile ea hloauoa hore e hokeloe marang-rang. A ipiletsa ho sehchaba ho nka boirakabello ba ho baballa thepa ena e le hore ba nolofaloe ke ho sebelisa marang-rang ba le habo bona.



Mafu a seoa ke koluo

Nthabeleng Seitlheko

Molula-Setulo oa Komiti ea Paramente e shebaneng le Boiketlo ba Sechaba Makhalanya Mokhothu, o re methati e melele e lateloang ha ho arabeloa litaba tsa tlokotsi li tlameha ho fela. Tsena li hlaleletse puong ea hae h'a bula koetliso ea khoeli ea bahlanka ba tsoang makaleng a fapaneng, e reretsoeng ho ba thakela ka malebela bakeng sa boithopho nakong ea mafu a likoluo, ka la 20 Motšeanong monongoaha.

O re mafu a seoa le litaba tsa likoluo li lokela ho potlakeloa e seng li sitoe ho sebetsoa ka lebaka la lintho tse ka felisoang. A re seoa sa COVID-19 se bontšitse hore ha ho naha e malala-a-laotsoe ho hlola mafu a seoa, ka hona ke nako ea hore ba lule ba itlhophetse maemo a joalo 'me bohle ba fumaneng koetliso ba be boemong ba ho thusa le bahloki linakong tse thata.

Mohokahanyi oa Morero oa EPR Flagship Zewdu Assefa, o re ba rata ho bona batho ba kaholimo ho 3, 000 ba arabela mathata nakong ea mafu a seoa ka matsatsi a mabeli ho isa ho a mararo. A re ba tl'o ba matlafatsa ka litsebo tseo ba tla li kenya tšebetsong molemong oa ho baballa bophelo ba sechaba.

Mohokahanyi oa Sesi sa Thibelo le Taolo ea Mafu (CDC) Lesotho Esther Muchense, o re linaha tsa Afrika li na le ho fumana mafu a seoa joaloka linaha tse ling ka hona ba tlameha ho lula ba itlhophile ho a hlola. A



re mafung a kang Ebola, COVID-19 le a mang a susumelitse hore ba lule ba itlhophetse ho arabela mafu a seoa joaloka linaha tse ling.

Moemeli oa Mokhatlo oa Lefatše oa Bophelo (WHO) Dr. Richard Banda, o itse ba tlameha ho bona hore linaha li lula li itlhophile sebakeng sa toantšo ea mafu a seoa molemong oa ho qoba tahlehelo ea bophelo ba sechaba. O re linaha li tlameha ho lula li itlhophile ka linako tsohle hobane mafu a seoa le mangata morao tjena.

Koetliso ena e tšehelisoa ka lichelete ke WHO ka kopanelo le CDC, 'me bohle bao nkileng karolo ba tla ba le seabo kahar'a Mokhatlo oa Litsebi oa Afrika ho arabela mafu a seoa.

... "mafua a seoa le litaba tsa likoluo li lokela ho potlakeloa e seng li sitoe ho sebetsoa ka lebaka la lintho tse ka felisoang..."

What we have left is more vital



Teboho Matjeka

We are wired to mourn and cry for what we have lost instead of taking care of what is in our possession. We hold on to that which is gone and allow it to take with it our joy, control us in absentia, shape the way we behave, think

and act. This tendency to mourn what is gone hurts that which is still with us. If it's people we mourn, those who hang around us feel unwanted and worthless because all our energy and attention are on those who left, by the time we feel like

we are ready to give them attention, we find that they have accepted the position, that of being insignificant and they can't give us the support or care we need.

In fact, we end up having a feeling that we cannot hold a relationship only because we were busy watering the dead plants ignoring those that are still alive, thereby, leading to death. It is important to realise that there is more value in life than in death. Let's give attention and love to what is in our possession rather than killing it by focusing on what is gone. There is power in honouring what is ours than showing desperation by fighting a lost battle. It's time we realise the strength of preserving the relationship with those who want to be with us than running after those who see no value in us.

Moeletsi oa Basotho
MOELETSI OA BASOTHO



@oaBasotho

WhatsApp +266 680 78 124

Moeletsi oa Basotho

To advertise with us, please contact:

Tell: (+266) 2835 0466

Email: adverts@moeletsiobasotho@gmail.com

1

Sesotho Newspaper in Lesotho

Phokeng e hatela pele

Nthabeleng Seitlheko

Hlathe e lelekisa tsebe ho lihoai tsa Phokeng Farm tse atlehileng ho hokela mekhoha e ntlafetseng ea noesetso masimong, ho anetsa tlhahiso

O re noesetso ke e 'ngoe ea liqholotso tse kholo tse tobaneng le temo ea masimong hobane ho le hole le linoka, liliba le matangoana, 'me lihoai tse ngata li qetella li nyahame-la ho hlahisa hobane lijalo li hloka tlhokomelo le mongobo



so ea bona. A re ka linako tseling ba ne ba angoa ke komello 'me tlhahiso e ba boemong bo tlase kapa ho se hlahetho leha ho le joalo ba ile ba mamela hofihlela ha joale.

Phokeng Farm e itlhomeng pele ka tlhahiso ea litapole e hlahosoa e tli'o tsetela ka matla temong ea meroho ka mefuta e fapakaneng kaha metsi a se a le haufi hape e le karolo ea ho ntlafatsa tlhahiso ea bona. O re bareki ba bona ba ne ba le seboko ke

tlhokahalo ea meroho empha joale ba se ba tli'o hlahisa lijalo ka mefuta e fapakaneng. O bontšitse ha ba ile ba kena temong ea lijo-thollo eo ba ileng ba e nyahlatsa hobane e ne e sa ba atlehele hantle.

Mochebelele o re Naha ea Lesotho e na le qholotso ea tlhahiso e hlahang ka nako e le 'ngoe e bile e nyamela, 'me seo se bakoa ke hobane lihoai li se na lintho tse sireletsang lijalo nakong Mariha le Hlabua hore ba lule ba hlahisa. A re

molemo oa ho hlahisa selemo ho pota ke hore sechaba se tla qoba ho reka lijo ka litheko tse holimo.

A supa hore ba ikemiselitse ho lema leha maemo a leholumo a se matle kaha phetoho ea boemo ba leholimo e le qholotso, 'me tla hlahisa ho fihlela ba tloaela le ho fumana maqheka a ho tsamaiso khoebo. A phethela ka ho ipiletsa ho Basotho ho lema ka se ba nang le sona molemong oa boipheliso.



e potolohang selemo sohle. Tsenali boletsoe ke mothehi oa Phokeng Farm, Tlaba Mochebelele, puisanong le Koranta ka la 19 Mots'eanong monongoaha.

nako le nako. O itse ba atlehile ho hokela mathompo masimong, ho cheka metsi fats'e a tla thusa hore ba lule ba noesetsa khafetsa ho matlafatsa tlhahi-



Ba fasoa palong joaloka pere

Nthabeleng Seithleko

Metebo ea sepolesa e lipakeng tsa e robong le 10 ke li rutha tse lokelang ho heletsoa kapa e koaloe kaha e se libaka tse bolokehileng tsa ho sebeletsa. Tsena li boletsoe ke Monamoli Adv. Tlotliso Polaki, 'mokeng oa bo-ralitaba oa la 21 Motšeanong monongoaha.

O re motebo oa Sepolesa oa Thaba-Morena, Liphirring, 'Moteng hara e meng ke maphao maboteng, mapolesa a lula le babelaelloa 'nqa e le 'ngoe ha 'moteng teng ho belaelloa ba fasoa palong motšeaare ho fihlela litaba tsa bona li sebelitsoe, ha shoalane e tšoara ba lula 'moho le mapolesa.

O re ba entse tlhahlobo metebong e 40, moo ba fumaneng hore mapolesa a sebetsa a se na seaparo sa tšebetso e leng ho ba hlokisang seriti mosebetsing oa bona, ba boetse ha ba na pampiri ea ho ngolla hoo mang kapa mang ea hlokang litšebeliso a tlamehang ho ntša chelete ho reka buka, ha litokomanane tsa 'muso li bolokiloe kahar'a litafole tse soahlanang, litulo le lisebelisoa tsa liofisi ke marantha a se nang chebahalo.

O fumane hore mapolesa a sebelisa likoloi tsa baeti ho isa batšoarua makhotleng ka lebaka la tlhokahalo ea

likoloi, 'me ka nako e 'ngoe ba thusoa ke sechaba. Ka hona o re taba eo e kotsi hobane motho ea joalo a ka ba sotha letsoho hobane ba le mohaung oa hae.

O itse bohloeki ke qholotso e kholo hobane a mang a matlo a manyane, hape ka lebaka la tlhokahalo ea matloana a boithuso babelaelloa ba lula le nkho e sebelisoang ho ithusa. Ho feta o re ha ho khantšoe, likobo ke matairi le babelaelloa ha ba itlhatsoe ntle le basali le hona ba ile linakong. O re tšoentsoe ke taba ena hobane babelaelloa ke batho ba nang le litlhoko tse

lokelang ho hlonepshoa.

Ka lehlakoreng le leng o re ho na le khatelopele ea meaho e mecha libakeng tse ling ka moo babelaelloa ba lulang ka teng.

O itse o makatsoa ke hore mapolesa a qetela koetliso mohla ba tsoang setsing sa koetliso, ho feta ba ithuta tsohle ka bo-bona, ba boetse ha ba fumane chelete ea temalo joaloka litsi tse ling. Ka hona a ipiletsa hore molao oa tšireletso ea bahlanka o hlalohoe molemong ba tšebetso e tsoileng matsoho. A re mapolesa a sebelisa mehala ea bona ea thekeng ho etsa lipatlisiso,

ka hona motho h'a hloka litšebeliso ka nako e 'ngoe o hloka ho reka moea.

Monamoli o file Lekala la tsa Lehae, Sepolesa Borena le Puso ea Libaka boikarabello ba ho bona hore mapolesa a fumantšoa litlhoko joaloka likoloi le lisebelisoa. A re tokiso ea sebaka, khokelo ea metsi le khaho ea matloana e lokela ho etsoang hang-hang molemong oa ho boloka bohloeki. A ipiletsa hore mapolesa a fuoe seaparo sa mosebetsi e le hore ba be le seriti, ho se lebeloe ke koetliso hape.

H'a phethela o itse o etsa mosebetsi ona a ipapisitse

le molao oa motheo o mo fang matla a ho hlahloba libaka tseo sechaba se khobokanang le ho sebetsa ho tsona ka bongata. A re moo e bang likhothaletso ha li kengoe tšebetsong o tlalehela paramente.

Mookameli Lefapheng la liphuputso Adv. 'Maretšepile Motanyane, o re boemo bo mpefetse ka 10% litabeng tsa tsamaiso ea sepolesa papisong le selemo sa 2015 hobane ho se khothaletso ea monamoli e neng e kengoe tšebetsong ka nako eo. A re ho se fumane tlhokofatso ea babelaelloa ho bontša kholo sepoleseng.

Nthabeleng Seithleko

Tšebeliso e mpe ea mobu



Morena oa Sehlooho oa Thaba-Bosiu Khoabane Theko o bontšitse hore morero oa ntlo ea habo ke ho eletsisa 'me e se eka babusi ba ka eletseha litabeng tsa tšebeliso ea mobu. A re ha meralo e nepahetse metse e lokela ho ba mesikong ea lithaba.

O supile ha mobu o sebelisoa hampe haholo, ka hona a ipiletsa ho letona le ikarabellang ho phahamela mapoqo ho sireletsa letlotlo lena. A re molao oa mobu oa selemo sa 2010 o lokela ho chakeloa hobane tšebeliso e mpe e ntse e tsoelapele.

Setho sa Ntlo ea Senate Dr. Thabiso Lebeso o itse taba ea mobu e kholo ba lokela ho ema ka thata ho tla ka lintlha tse matla ho o sireletsa. A re hoa bonahala hore ho ntse ho e-na le qholotso e kholo bakeng sa ho rala tšebeliso ea hona joale 'me mohlala ke moo Letona la Mehlang la Puso ea Libaka le Borena Dr. Pontšo Sekatle a ileng a arola mobu oa khoebo, temo le mabitla.

Morena oa Sehlooho oa Lioli, Khabasheane Masupha o itse ha ho ka thehoa komisi ena, e tla lopolle naha tšebeliso e mpe ea mobu kaha ba nang le matla ba reka mobu ho mafutsana a sala a se na letho le ka ba phelisang. O itse leha motho a e-na le pelaelo ka tšebeliso ea mobu linyeoe li nka nako, ka hoo taba ena e tlameha ho atameloa kapele-pele.

Sepolesa se khutsisa molumo

Nthabeleng Seithleko

Sepolesa se laela sechaba ho khutlisa lithunya, libetsa tsohle tse seng molaong le mahlaahlela metebong ea sepolesa le mareneng. Tsena li boletsoe ke ea Tšoereng molepo e le Mookameli oa Sepolesa, Dr. Mahlape Morai, 'mokeng oa litaba, oa la 21 Motšeanong monongoaha.

O re mosebetsi ona o tla nka matsatsi a 14, ka hona o tla fihla pheletsong ka la 5 Phupu monongoaha. O re sena se entsoe ho ipapisitsoe le palo e holimo ea Basotho e nang le lithunya tse seng molaong, ka hona sepolesa se ikelelitse ho kena letšolong la 'khutsisa molumo oa sethunya naha ka bophara.'

O re morero ke ho akofi-

sa tšireletso le polokeho ea Basotho, 'me e tla ba letšollo la tšoarelo ka hoo bohle ba koptjoa ho nehelana ka lithepa tseo libakeng tse boletsoeng.

A re letsatsi le letsatsi sepolesa se tšoara litloli tsa molao tse ruhileng lithunya ka thoko ho molao, ha beke le beke naha e apareloa ke bofifi ba lefu le bakoang ke sethunya.

H'a phethela o itse Mosotho o lokolohile ho nehelana ka thepa eo libakeng tse boletsoeng ntle le ho fana ka boitsebiso. A re kamora matsatsi a 14 a tšoarelo motho e mong le e mong ea tla fumanoa ka mahlaahlela 'moho le libetsa tse kotsi o tla tobana le letsoho la molao.

Litho tsa Ntlo ea Senate li khothaletsa 'Musos oa Lesotho ho theha komisi ea mafapha a fapakaneng holima tsamaiso taolo ea mobu. Tsena li hlaleletse tulong ea Ntlo ea Senate, ka la 21 Motšeanong monongoaha.

Setho sa Ntlo ea Senate Seabata Motsamai, o supile hore komisi eo thomo ea eona e tla ba ho hokahanya melao eohle e amanang le tšebeliso ea mobu mafapheng a bolulo, temo le khoebo. A etsa khothaletso ho makala a mabeli e leng la Mesebetsi e Moholo le Temo ho sheba melao eo ka hloko e le ho sireletsa mobu oa temo, hobane ke letlotlo le tla thusa bomosong ba naha.

O tsoelapele ho re komisi e tla thusa ho hokahanya melao eohle e amanang le

kabo ea mobu, ho akofisa tšebeliso ea mobu libakeng tsa mabalane le mahaeng, ho rala mobu ka lihlopha, ho theha moralo oa tšebeliso ea mobu o tlang ho kengoa molaong. A re Lekhotla la Tsamaiso ea Mobu (LAA) le lokela ho eletsisa letona ntlheng ea tsamaiso ea mobu e le hore ho etsoa meralo e metle e tla kenya chelete ho holisa moruo.


Morena oa Sehlooho oa Likhoele Leshoboro Seeiso, o itse ha ho ntho e ntle ho feta mobu kahar'a naha, ka hona e hloka babusi ba sebete ho etsa liqeto litabeng tse nepahetseng tsa tsamaiso ea mobu kaha ha kabo ea ona e ntse e fohala le naha e sa eketsehe. A bontša e le boikarabello ba Basotho ho ntlafatsa naha ea habo bona.



MOB KIDDS

EDUTAINMENT

WINTER WEATHER




Across

- 1 Moen'a 'm'e (6)
- 4 Ausi oa malome, e moholo habo. (6)
- 5 Ea kenyang bashemane lenakeng (5)
- 7 Mosali oa ka (7)
- 9 Ngoana oa moena oa 'm'e oa ka. (8)
- 10 Mosali ea nyetsoeng ke monn'a ausi oa hae. (7)
- 14 Basali ba mophatong (10)
- 16 Ngoana oa khatseli ea ka. (7)
- 19 Moo ho rutoang bana moetlo le boitšoaro bo botle. (9)
- 21 Ngoan'eso oa ngoanana (9)
- 23 Nako ea ho tloha ho Phato ho isa Mphalane ho Basotho (6)
- 24 Ea nyetseng moo ke nyetseng. (4)

Down

- 2 Monna oa morali oa ka. (11)
- 3 Ketso ea ho hloka bana (7)
- 6 Motsoali (5)
- 8 Boleng boo motho a tla lefa ntho e itseng ka bona. (8)
- 11 Ngoana ea behiloeng ka thoko ho lenyalo la molao. Ngoana oa..... (8)
- 12 Habo mosali oa ka (7)
- 13 Batho ba pepisang (8)
- 15 Setokisi (7)
- 17 Boemo ba ho ba bohlokong ka lebaka la lefu. (6)
- 18 Batho ba lumeletsoeng ho pepisa (5)
- 20 Motho ea bekang bana thabeng (6)
- 22 Ho tlohella ntho e itseng ha nakoana. (3)



TSA KEREKE

Bacha ba tšoara tebelo



2023-2024 SELEMO B

MOKETE OA BORARO BO HALALELANG

Deutronoma 4,32-34.
39-40

Pesalema 32

Ba-Roma 8,14-17

Matheus 28,16-20



Khothatso

Ntate, le Mora le Moea o Halalelang

Joalokaha le utloile Bukeng ea Deteronoma Molimo Ntate ke e mong oa Baperosone Ba Bararo, Thutong ea Bobeli (Ba-Roma 14-17) sebui se bua ka Moea oa Molimo e leng Moperosone oa Boraro. Evangeling (Matheus 28:16-20) teng le utloa ka Moperosone oa Bobeli e leng Jesu Kriste, moo Molimo a ileng a ikhethela ho inkela botho ba lona.

Morena Jesu Kriste o laela barutuo ba hae ho hlatsoa bohle ka Lebitso la Ntate, le Mora le la Moea o Halalelang, e leng mantsoe a sebelisoang ke baprista ho hlohonolofatsa batho, lisakramentale kapa ha ba aba lisakramente. Hona ke bopaki ba hore ho na le Baperosone ba Bararo empa Molimo o Mong.

Lilemo tse 2, 000 tse fetileng esale batho ba leka ho hlalosa taba ea hore baperosone ba Bararo ho Molimo a le mong, litlhaloso tsa bona li ne li sa hlalose kapa ho hlakisa hantle misteri ona. Ho na le mehlala e fanoang e mengata ha ho rutoa ka Boraro bo Halalelang 'me oa pele oa bana ke oa pampiri e menoang hore ebe likoto li tharo. Pampiri ena e ba Morena Molimo ebe likoto tse tharo e ba Baperosone ba Bararo ho Morena Molimo.

Ha u hlalose tsa ba seng ba kene boroetsaneng le bohlanang u sebelisa lehe; le nang le likarolo tse tharo; khaketlana, bosoeu le mothoebe. Tlhaloso e ba ena; khaketlana e emetse Morena Jesu, bosoeu ke Moea o Halalelang ebe mothoebe ke Molimo Ntate. Molimo Ntate le Moea o Halalelang ba patehile joaloka bosoeu le mothoebe, ntle leha u pshatla lehe.

Tlhaloso e 'ngoe eo ke fumanang e hlakile ho feta tsena tsohle ke eo ke ileng ka e phetheloa ke monna e mong, ea neng a re ho no e-na le batho ba neng ba ile ba fumana thabo bophelong ba bona. Nakong eo ba leng makhatheng a lefu ba fumana lingaka le baoki ba neng ba leka ka litsela tsohle ho ba khutlisetsa bophelong. Mofuta ona oa batho ha o sa tšaba lefu ho hang ebile ba lumela bophelong kamor'a lefu.

Bongata ba bona ba bolela hore ba ipone ba le maemong a moea, joale potso ke hore na taba ee e teng kahar'a Bibehe na? Jakobo 2:26 e re "Mele o se nang moea o shoele." Joannes 6:63, Kriste a re, "Ke moea o fanang ka bophelo; moea ha o na thuso."

Moea ona o laoloa ke ho hong moo tšoano eane ea Morena Molimo e lutseng hona teng. Ntho eno ke eona e laolang moea ona 'moho le nama, ha feela "Ke" e sa fane ka taelo moea le nama ha li sisinyeha. O tsoelapele ho re motho o na le menahano e 'meli, 'me taba ena e pakoa ke Mangolo a Halalelang, Jakobo 1:8 le 4:8. Mohlomong u ka tleloa ke monahano oa hore taba eo ha e bolele hore ehlile motho o na le menahano e 'meli, u bale Ba-Roma 7:15 moo Paulosi a hlalolang hore ha utloisise liketso tsa hae hobane o etsa hantle seo a sa se rateng.

Haeba sena se le thata haholo ho utloisiseha ha re nkeng mohlala oa Francis ea Halalelang le Padre Pio ba neng ba khona ho ba libakeng tse peli ka nako e le 'ngoe. 'Mele o mong le o mong o ne o khona ho nka liqeto tsa ona hobane 'nqa e 'ngoe e ne le moea, ho e 'ngoe e le nama.

Lekhotla la Ephesus thutong ea lona le hlalosa hore tsela eo Kriste a lulang ho rona ka eona e fapakane hole le eo Ntate a lulang ho eena ka eona. Kriste o lula ho rona ka Moea, empa Molimo Ntate o lula ho eena ka karolo eane eo re ileng ra e reha "Ke", 'me sena se netefatsa hore re bopuo ka tšoano le Morena Molimo ka 'mele le moea.

Bahalaleli har'a Beke

- 27 Motšeanong Bruno
- 28 Motšeanong Accidia
- 29 Motšeanong Conon
- 30 Motšeanong Hubert
- 31 Motšeanong Vitalis
- 1 Phupjane Eneco

Tšeliso Thakholi

Bacha ba tikoloho ea Mazenod ba ile ba etellapele litšebelotso tsa Mokete o Moholo oa Pentekonta ka ho tšoara reterete e khetheleng ea tebelo ea Moea o Halalelang e bileng Parishing ea Maria Mofumahali oa Lefaatše, Mazenod bosiu ba la 18 Motšeanong 2024.

Ka tšebetso e babatsehlang ea Fr. Justinus Moloi OMI, Fr. Emmanuel Lebesse OMI le Monghali Peter Tsoamotse ba ileng ba hlahlella bacha ka malebela retereteng ena hara tse ling ka thuto mabapi le makha-

bane, bohlokoa le bophelo ba Eugene de Mazenod ea Halalelang, thuto ka Moea o Halalelang kaha e le Molimo ka Baperosone ba Bararo, e leng Ntate, Mora le Moea o Halalelang. Ho feta mona bacha ba boetse ba hlaheloa ka malebela mabapi ka mekhoha e fapakaneng ea boipheliso.

Khubu ea reterete ena e bile Sehlabelo se Halalelang sa 'Missa se bileng mesong ea Sontaha moo Fr. Justinus Moloi OMI khothatsong ea hae a boletseng hore bohle Morena Molimo o re file lineo tse fapakaneng tsa Moea o Halalelang, empa hangata bacha ba li sebelisa hampe hoo ka nako e 'ngoe li qetellang li sa ba tsoele molemo.

A re mocha ka mong o lokela ho inahana hore na

mpho ena eo a filoeng e o e sebelisa joang. "Ka lineo tseo Molimo a u fileng tsona u le mocha, letsoalo la hao le u laole hore u etse lintho tse ntle." O boletse joalo a bile a eketsa ka hore bacha ba tlokotsing e kholo ha feela ba sa tsamaisoe ke Moea o Halalelang. Ka hona ba latele lineo tsa ona e le hore ba tsebe ho etsa lintho tse ntle, 'me ba bule lipelo tsa bona e le hore Moea o Halalelang o tle o tsebe ho sebetsa ka ho bona.

A thetha ka hore Morena Jesu Kriste ke mohloli oa Moea o Halalelang, 'me o lula a re tšehelitse ha feela re itšetlehile ka eena, kaha o ile a tela bophelo ba hae a bo tella rona. Hang kamorao ho 'Missa e bile Tlhonopho ea Sacramente e Halalelang.



O tšoanetsoe ke moqhaka oa tiholo



Tšeliso Thakholi

Kamor'a hore sehlopha sa Lioli se bapale bolo e tsoileng matsoho selemong sena lipapali, se be se qetelle ka ho phamola chelete e kaalo ka M650,000.00 le Mohope oa Vodacom Premier League ho Bantu, papaling ea sona ea ho qetela ea Liki moo se ileng sa bapala ka seahlolo sa 1-1 le Matlama mafelong a beke a tsoa feta, barati le batšehetsi ba bangata ba Lioli ba bonahetse ba boela ba tšepa sehlopha sa bona.

Pejana selemo sa lipapali ha se qala, mokoetlisi ea neng a sa tsoa fihla kahare ho sehlopha, Monghali Mtheo 'Six to Six' Mohape o ne a ile a supa hore thomo ea hae ea mantlha ke ho khutlisa seriti sa Lioli, ka hore se bapale bolo ea boemo bo holimo. "Haele mohope ona e tla ba bonus." O ne a rialo. Ho fetse ha e-ba joalo 'me balateli ba Lioli ba neng ba se ba itjalile lihlopheng tse ling ba khutlile ka bongata bo hlolang, ho tla rata le ho tšehetsa sehlopha sa bona.

Leha Lioli e qalile lipa-

pali tsa eona tsa liki e ntse e khibela mona le mane, empa boteng ba Mohapi bo tlisitse liphetofo tse khohlo tsa bohlokoa kahare ho sehlopha. Hara tse ling tsa lintho tsa bohlokoa tseo a li entseng ke ho bopa bongoe ba sehlopha, 'me sena sa tšoaetsa botsamaisi le batšehetsi hore o nka nketsang ha e ahe motse. Kamorao ho mona a fetola boemo ba papali ea Lioli, ea khutlela moo ba bangata ba neng ba e tseba ka papali ea eona e khang mahlo.

Mohapi eo hlathe e neng e lelekisa tsebe ke thabo, kamora ho tšepahalla thomo ea hae, o boletse hore ha e'a ka ea e-ba ntho e bobebe hore a phethaha-

tse thomo kaha ho ne ho le boima, "haholo ha motho o e phethahalitse ka sebopeho sena seo e phethahetseng ka sona."

"Letsatsing lena seriti sa Lioli se khutlile, joale le moruo le ona o khutlile hobane sechaba sena se sengata se tšileng papaling ena se jele TY mona, 'me likhoebo tse na kaofela li kentse letho. Berea mona ke khora feela." A rialo. A re ho bile boima haholo empa ka lehlohonolo o ile a fumana libapali tse itetseng, tse mamelang le ho sebetsa ka thata. A leboha tšebeliso e mofuthu le tšehetso e matla eo a e fumaneng ho botsamaisi, libapali le batšehetsi bohle ba sehlopha.



Majantja e imona monoana

Tšeliso Thakholi

Sehlopha sa Papali ea Bolo ea Mao-to sa Majantja se ile sa amohelela Mohope oa Champs of Champs ka thabo e khohlo kamora ho hlola Sehlopha sa Mzamane thahong ea mekoko ka 4-3(1-1), Leb-aleng la Bambatha Sports Arena, Maseru ka la 19

Motšeanong 2024.

Majantja e ile ea amohelela mohope o neng o tsamaea le limentlele tsa Khauta le pampiri-chelete ea boleng ba M25,000.00. Lipapaling tse na ke moo libapali, bakoetlisi ba lihlopha le batsamaisi ba lipapali ba ipabotseng ba ileng ba fuoa limentlele tsa khauta motho ka mong. Haele Mzamane e ile ea khaketsoa chelete e kaalo ka M20,000.00 le limentlele tsa Silifera.

H'a bua kamora papali Mokoetlisi oa Majantja, Bafokeng Mohapi o itse ba malala-a-laotsoe ho tla e hlanaka lihlopheng tse khohlo tsa Premier, selemong se secha sa lipapali tsa 2024/25, empa ba hloka ho itokisa haholoanyane ho feta mona. A re ke 'nete ba ntse ba hloka ho tlatseletsa sehlopha mona le mane empa ha feela ba ka itokisa hantle ba tla bapala ka tsona libapali tse teng. "Ke bahlankana ba banyenyane haholo ha feela re ka etsa lintho hantle e sa le qalong ea selemo sa lipapali re ka sebetsa hantle, empa re tla hloka ba seng ba kae ho matlafatsa sehlopha sa rona." A rialo.

A latola menyenetsi e reng mohlaba-lintlha oa hae, Moriana Moriana o batloa ke sehlopha sa Bantu, empa ha taba e joalo e se e tekiloe kapele ho botsamaisi ba sehlopha ba ke ke ba thibela sebakali ho ea makhulong a matala. A re seo ba se batlang ke ho



bona libapali tsa bona li e-na le bokamoso bo chabileng.

Haele mokoetlisi oa Mzamane, Botha 'Zane' Ramantsoe o boletse hore leha ba hlotsoe thahong ea mekoko o thabile haholo ke tsela eo sehlopha sa hae se bapetseng ka teng. "Re lahlehetsoe ka thabo ea mekoko, ha se letho ntho eno hobane kahar'a papali re atlehile ho etsa lintho tseo re neng re lumellane ka tsona." O boletse joalo a bile a eketsa ka hore ntho e mo thabisitseng ka ho fetisi-

sa ke hobane ba atlehile ho bapala ho latela moralo oa bona. "Ka lona lebaka lena ke khotsofetse haholo hoo le tahlehelo ena ea thabo ea mekoko ke sa tsotelleng ka letho." A rialo. A tiisa hore o na le sehlopha se matla se tla tseba ho tsitsa Liking e Khohlo. A re moralo oa bona ke hore lilemo tse peli ba le liking, ba sebeletse hore ba tsitse hantle ebe selemong sa moraro ke hona ba ka qalang ho itokisetsa ho kenela litlholiso tsa ho hapa liki.



Chess e itokisetsa AYCC

Tšelisothakholi

Ke libapali tse 11 tsa banana le bashanyana ba lilemo li katlaase ho tse robeli ho isa ho tse 18 ka har'a naha, ba papali ea Chess ba tlang ho kenela litlholisano tsa Mohope oa African Youth Chess Championship (AYCC), tse il' o tsoareloa Profensing ea Khauteng, Afrika Boroa ka la 13 ho isa la 23 Phupjane 2024.

Ka ho bashanyana mabitso a bona ke Mateisi Seeiso ho U/8, Letuka Tšepo ho U/10, Thato Moorosi ho U/12, Lintša Kamohelo ho U/14, Mokhameleli Mohale ho U/16 le Pofane Matlali ho U/18. Athe ka ho banana ke

Hlengiwe Phera ho U/10, Ntebohelong Thetsane ho U/16, Mpoetsi Thamae ho U/12, Kananelo Khakhane ho U/14 le Bonolo Ntsielo ho U/18.

E le ho bopa mokhethoa ona oa naha oa ba banyenyane, e boetse e le boitokisetso ba lipapali tse na ho bile le litlholisano tsa National Youth Championship tse bileng Lancer Inn, Maseru ka la 18 ho isa la 19 Motšeanong monongoaha moo ho ileng ha hloauoa libapali tse tharo tse ipabotseng sehlopheng ka seng, 'me har'a tsona ha nkoa feela ea hlahileng maamong a pele ho etsa libapali tse 11.

Mohlophisi oa litlholisano tsa



National Youth Championship, monghali Tlhoriso Morienyane o re litlholisano tse na e bile tsa boemo bo holimo haholo, 'me li ne li khobokantse bana ba 105 ho hlaha literekeng tse fapakaneng tsa naha. A re o thabile haholo ho bona tšehetso ho tsoa bakoetlising ba bana le ho batsoali ba bileng teng ho tla boha bana ba bona ha ba bapala Chess ka makhethe le ka boitelo bo boholo.

A re sena se bebofaletsa bakoetlisi mosebetsi ha ba kopa batsoali ho lokola bana ho tla papaling, kaha ba tla be ba utloisisa hore ba fela ba ea papaling e seng mabakeng a mang. "Bo teng ba batsoali papaling ea Chess bo etsa hore ba be le kutloisiso le ho bopa setsoalle lipakeng tsa rona le bona. Bo teng ba bona ka 'nete bo bohlokoa haholo." O boletse joalo a bile a eketsa ka hore ke mosebetsi oo ba ntseng ba o etsa nako le nako oa ho kopana le batsoali ba bana, e le ho ba kopa ho khotlaetsa bana ho itahlela ka setotsoana papaling ea Chess. A qetella ka ho hlokomelisa batsoali hore leha bana ba sa atleha ho ba bahloli, feela ba rata ho ea kenela lipapali tse il' o ba Naheng ea Afrika Boroa, mamati a butsoe hore ba ka ea ba ngolisa ho ea bapala, empa erekaha e se bahloli ba tla itefella.

Tšelisothakholi

Komiti e Tsamaisang Papali ea Senuka Seterekeng sa Maseru (DISCUSS) e ahlotse Sehlopha sa Lechaeneng Pool Club le ho behella ka thoko sebapali sa sona Relebohile Mopeli ea tsejoang haholo papaling ena ka lebitso la 'Qacha', se sa ngolisang ka molao, se bile se belaeloa ka hore se ingolisitse le ho bapala lihlopheng tse ngata tsa Senuka ho tloha ha lipapali tse na li qala.

Puisanong le Molula-Setulo oa Maseru DISCUSS, Monghali Likhoeli Likhoeli o su-

Lechaeneng e ka mosing

pile hore ba abetse Sehlopha sa Bakwena lintlha tse 25 le lintlha-kholo tse 4, tsa papali ea bona le Lechaeneng. Ba boela ba e phaella ka kotlo ea chelete e kaalo ka M200.00. A re sena ba se entse ba ipapisitse le melao le melaoana e tsamaisang papali e Senuka, 'me sehlopha ha se sa khotsofalla kahlolo se na le tokelo ea ho ipiletsa makhotleng a ka holimo a papali ea Senuka.

A re ba otlile Lechaeneng ka kahlolo ena e boima hobane botsamaisi ba sehlopha seo

bo tiisitse hore bo mo bapalisitse, "feela ba ntse ba tseba hantle hore o beheletsoe kathoko ho lipapali ke komiti ka lebaka la lihlopha tse ngata tse hlahletseng litlitlebo ka eena." Ka hona ba ne ba ile ba etsa phatlalatso lihlopheng tsohle hore a se bapale ho fihlela litaba tsa hae li buoe. "Empa Lechaeneng e ile ea ikhethela ho mo sebelisa kaboomo le ka moro." A rialo. A re ho fihlela ha joale Lechaeneng e ngoletse Komiti e Kholo e bontša ho se khotsofale.

Motsamaisi oa Sehlopha sa Lechaeneng, Relebohile Takane eo ba Moeletsi oa Basotho ba nang le litokomane tse tiisang hore e fela 'Qacha' e le sebapali sa bona, 'me ba mo ngolisitse ka molao o tiisitse hore ba bapalisitse Qacha papaling ea bona le Bakwena libekeng tse peli tse fetileng. A re mathoasong ea khoeli ea boraro ba ile ba romella lethathamo la mabitso a libapali tsa bona ho komiti, 'me 'Qacha' a ntse a hlaha lethathamong le joalo. A re tsebiso ea hore Qacha

o beheletsoe kathoko ke lehoetla ho bona.

A re se makatsang haholo ke hore ba se ba fuoe kahlolo empa ba e-s'o fumane qoso ea letho. A re ba ngoletse eona komiti e ba fileng kahlolo, ba kopa ho ea kopana le eona ho tšohla taba ena, 'me matsatsi a mahlano h'a ka a feta ba ntse ba e-s'o ba arabe ba fetela Komiting e Kholo hore e kene lipakeng. "Qacha haesale e ntse e le sebapali sa rona." Ke Takane eo. Tse-na li etsahala Lechaeneng e saletsoe ke lipapali tse 'ne pele e phethela mokhahlelo oa bobeli oa lipapali tsa liki.

“Breaking the Cycle: Preventing Fistula Worldwide.”

International Day to end obstetric Fistula which is observed globally every year on the 23 May, will this year be marked under the theme; “Breaking the Cycle: Preventing Fistula Worldwide.” The 2024 theme underscores the critical importance of proactive measures to prevent obstetric fistula and its far-reaching consequences. It also spotlights prevention and calls for urgent action to address health-care and societal gaps and inequalities that lead to prolonged obstructed labour; the direct cause of obstetric fistula.

By focusing on prevention, the theme aims to draw the attention of governments, community stakeholders, development partners, policy, and decision-makers to break this harmful cycle and to promote maternal health and well-being globally.

Obstetric fistula is a hole between the birth canal and bladder or rectum, caused by

prolonged, obstructed labour without access to timely, high-quality medical treatment. It leaves women and girls leaking urine, faeces or both, and often leads to chronic medical problems, depression, social isolation and deepening poverty. International Day to End Fistula is therefore a day to raise awareness, intensify actions, strengthen partnerships, and mobilize support to finally end this preventable and treatable condition.

The condition remains a significant health challenge, particularly in regions with limited access to timely medical care during childbirth. In Lesotho, evidence reflects that facility delivery is high (estimated at 77%) but the quality of care is suboptimal thus exposing women to prolonged labour. Global statistics show that half a million women and girls in sub-Saharan Africa, Asia, the Arab States region, Latin America

and the Caribbean are estimated to be living with fistula, with new cases developing every year. **YET FISTULA IS ALMOST ENTIRELY PREVENTABLE.**

As the leader of the global Campaign to End Fistula, UNFPA, the United Nations Population Fund provides strategic vision, technical guidance and support; medical supplies, training and capacity building, as well as funds for fistula prevention, treatment and social reintegration and advocacy programmes. UNFPA also strengthens sexual and reproductive health care including timely and quality emergency obstetric services to prevent obstetric fistula from occurring in the first place.

Evidence has shown that women and girls at risk of fistula are also at risk of maternal mortality, making advocacy and accelerated action towards ending fistula a matter of life and death. Accord-

ing to statistics, globally, for every maternal death, 20 to 30 additional women experience childbirth injuries that significantly affect their quality of life and well-being. In Lesotho, the Maternal Mortality Ratio is high, estimated at 566/100,000 live births.

Furthermore, midwives are recognized as key allies in preventing obstetric fistula, given their crucial role in providing maternal care. Investing in comprehensive maternal health services, including the training and deployment of skilled midwives, is essential for reducing the prevalence of fistula and improving maternal health outcomes.

UNFPA therefore calls for strategic investments to ensure equitable access to quality maternal health services that can prevent fistula cases from happening – and women and girls from preventable deaths.

By prioritizing prevention, timely intervention, and holistic

support, Lesotho can safeguard the health and well-being of mothers and new-borns, ultimately eliminating childbirth-related injuries and illnesses. There is therefore need for bold leadership, political will, and targeted investments that are indispensable for realizing the vision of eradicating obstetric fistula and ensuring the rights and dignity of women and girls worldwide.

About UNFPA:

UNFPA is the United Nations sexual and reproductive health agency. UNFPA's mission is to deliver a world where every pregnancy is wanted, every childbirth is safe and every young person's potential is fulfilled. UNFPA calls for the realization of reproductive rights for all and supports access to a wide range of sexual and reproductive health services, including voluntary family planning, quality maternal health care and comprehensive sexuality education.



Ba pphethela qomatsi

Nthabeleng Seithleko

Mokhethoa oa oa Thabo ba-Phatšoa Thabo Maretlane, o entse tšisinyo ea hore 'muso o phatlalatse qomatsi khahlanong le lipolao le bosholu ba liphoofo- lo. Tsena li hlaheletse tulong ea paramente

ea la 22 Motšeanong matšolo a tšireletso lit- monongoaha.

O re o etsa sena ho- bane a tšoentsoe ke lipolao tse sehloho tse sa khaotseng le bosholu ba liphoofo- bo siang masaka a se na letho e leng se bo- laeang moruo. A re ho na le litlokotsebe tse nkileng monyetla, ka hona o etsa kopo ea hore ho khinoe met- samao hape ho etsoa

matšolo a tšireletso lit- seleng.

Moetapele oa BPP Tefo Mapesela, o re tšisinyo ena e lokela ho fetisoa ke Tona-Kholo feela kaha a lumelloa ke molao oa motheo karolo ea 23, ka hona Maretlane a hule taba eo hobane ha e mol- emong oa naha ebile e tlabe e le ho amoha Tona-Kholo matla.

Mokhethoa oa 'Mak-

horoana Tšitso Cheba, o supile hore 'muso ha o'a mamela litaba tsa bapi le lipolao le bo- sholu ba liphoofo- lo, ka hoo ha joale 'muso o hloka ho fa Makhotla a Lesotho melao e a fang matla a ho fana ka likotlo tse matla. A re tse ling 'bail' e fano- ho latela hore na motho entse tlolo efe ea mo- lao. O itse e 'ngoe ea liqholotso tse ntseng li baka lipolao tsena ke

boiphethetso bo teng sechabenAg.

Mokhethoa oa Mat- lakeng Dr. Mahali Pha- motse o re qomatsi ha se eona e tla felisa hore sechaba se lipelo li bohloko empa 'muso o tlameha ho tla ka maano a hlakileng a ho thibela tlolo ea molao e seng o ame moruo, joaloka ho koala boqapi ba 'mino oa Sesotho le lihlahisoa tse etsoang ke Basotho e leng liko- bo.

YOUTH ENTREPRENEURSHIP SEMINAR





Day 1

- #(Understanding an Entrepreneur) Ho ikutloisisa hore na Mohoebi ke eng.
- #(Ethical Conduct of an Entrepreneur) Tsela ea boit'soaro ea Mohoebi.
- # (Financial Literacy) Ho utloisisa poloko ea libuka tsa khoebo

Day 2

- #What is Business Plan
- #Benefits of Business Plan.
- #How to draft 1 pager Business Plan
- #How to pitch business plan.

Attendance fee: M250 including Lunch.

Date: 5-6 June 2024
 Venue: Hlotse Youth Centre
 Time: from 09:00 - 03:00 pm

Date 29-30 May 2024
 Venue: Berea youth center.
 TIME: From 9:00 a.m to 3:00 p.m

Contacts and payment via (mpesa): 58777044

MUST BRING
-Book and pen

Be our Guest



www.moeletsoabasotho.co.ls